

現代生活藝術系列

華嚴經疏論纂要 93

— 離世間品之四

華藏淨宗學會印贈

大方廣佛華嚴經疏論纂要卷第九十三

五臺山清涼國師澄觀疏鈔

大原方山長者李通玄 論

閩鼓山私淑比丘道需纂要

離世間品第三十八之四

佛子。菩薩摩訶薩有十種無礙用。何等爲十。所謂衆生無礙用。國土無礙用。法無礙用。身無礙用。願無礙用。境界無礙用。智無礙用。神通無礙用。神力無礙用。力無礙用。

〔疏〕第八十無礙用。卽真如相迴向中行。如於真如

無障礙故。故彼位果云。住於此位。得一切利平等。平等卽是無礙之因。亦無礙之義。又云。得佛無量圓滿之身。一身充滿一切世界等。卽正顯無礙之義。文中四。先總標十章。二佛子云何下。總徵十章。三佛子菩薩下。依章別釋。四佛子如是下。總結成益。今初亦三。謂標徵列名。無礙者。前明自在。卽作用任運。今明無礙顯作用無拘。又無礙有二。一智。二事。十中有通有局。然法智無礙。多唯約智。如身利等。多唯約事。如衆生等。通於事智。然事無礙。必通於智。智無礙境。未必通事。二皆卽體之用。故

竝云無礙用也。然十皆通二利。且約化說。初一所化。二是化處。餘皆能化。謂化法化身等。可以意得。佛子。云何爲菩薩摩訶薩衆生等無礙用。佛子。菩薩摩訶薩有十種衆生無礙用。何者爲十。所謂知一切衆生無衆生無礙用。知一切衆生但想所持無礙用。爲一切衆生說法未曾失時無礙用。普化現一切衆生界無礙用。置一切衆生於一毛孔中而不迫隘無礙用。爲一切衆生示現他方一切世界令其悉見無礙用。爲一切衆生示現釋梵護世諸天身無礙用。爲一切衆生示現聲聞辟支佛寂靜威儀無礙用。爲一

切衆生示現菩薩行無礙用。爲一切衆生示現諸佛  
色身相好一切智力成等正覺無礙用。是爲十

〔疏〕第三依章別釋中。卽爲十段。文皆有四。謂標。徵。  
釋。結。今初所化衆生無礙用十句中。前三約智辨  
無礙。一了性空故。二唯心現故。此二實智。三知時  
說法。卽是權智。餘七約事無礙。四能現衆生故。五  
近收一毛。六遠示他利。餘四示上首之身。

佛子。菩薩摩訶薩有十種國土無礙用。何等爲十。所  
謂一切剎作一剎無礙用。一切剎入一毛孔無礙用。  
知一切剎無有盡無礙用。一身結跏坐充滿一切剎

無礙用。一身中現一切刹無礙用。震動一切刹不令  
衆生恐怖無礙用。以一切刹莊嚴具莊嚴一刹無礙  
用。以一刹莊嚴具莊嚴一切刹無礙用。以一如來一  
衆會徧一切佛刹示現衆生無礙用。一切小刹中刹  
大刹廣刹深刹仰刹覆刹側刹正刹徧諸方網無量  
差別。以此普示一切衆生無礙用。是爲十

疏第二刹無礙十中。知刹無盡。通智通事故。晉經  
云。於一切刹。深入無盡方便。度世云。一切佛界所  
入無盡。皆通事也。餘九唯事無礙。深卽微細刹。餘  
並可知。

佛子。菩薩摩訶薩有十種法無礙用。何等爲十。所謂  
知一切法入一法。一法入一切法。而亦不違衆生心  
解無礙用。從般若波羅蜜出生一切法。爲他解說悉  
令開悟無礙用。知一切法離文字而令衆生皆得悟  
入無礙用。知一切法入一相。而能演說無量法。相無  
礙用。知一切法離言說能爲他說無邊法門無礙用。  
於一切法善轉普門字輪無礙用。以一切法入一法  
門而不相違。於不可說劫說不窮盡無礙用。以一切  
法悉入佛法。令諸衆生皆得悟解無礙用。知一切法  
無有邊際無礙用。知一切法無障礙際。猶如幻網無

十  
量差別。於無量劫爲衆生說不可窮盡無礙用。是爲

〔疏〕第三法無礙。謂皆約智於性相無礙之法。能知說自在故。一多卽入而不壞本。一實智出權。三無文示文。四一說多相。五無說之說。六一言圓備。輪字之義。彌伽處釋。七門門互收。八以真收俗。九橫知無邊。十豎窮其際。

佛子。菩薩摩訶薩有十種身無礙用。何等爲十。所謂以一切衆生身入己身無礙用。以己身入一切衆生身無礙用。一切佛身入一佛身無礙用。一佛身入一



切佛身無礙用。一切刹入己身無礙用。以一身充徧一切三世法示現衆生無礙用。於一身示現無邊身入三昧無礙用。於一身示現衆生數等身成正覺無礙用。於一切衆生身現一衆生身。於一衆生身現一切衆生身無礙用。於一切衆生身示現法身。於法身示現一切衆生身無礙用。是爲十

**疏**第四身無礙用。文可知

佛子。菩薩摩訶薩有十種願無礙用。何等爲十。所謂以一切菩薩願作自願無礙用。以一切佛成菩提願力示現自成正覺無礙用。隨所化衆生自成阿耨多

羅三藐三菩提無礙用。於一切無邊際劫大願不斷  
無礙用。遠離識身不著智身。以自在願現一切身無  
礙用。捨棄自身成滿他願無礙用。普教化一切衆生  
而不捨大願無礙用。於一切劫行菩薩行而大願不  
斷無礙用。於一毛孔現成正覺。以願力故充徧一切  
諸佛國土。於不可說不可說世界爲一一衆生如是  
示現無礙用。說一句法徧一切法界。興大正法雲。耀  
解脫電光。震實法雷音。雨甘露味雨。以大願力充洽  
一切諸衆生界無礙用。是爲十

〔疏〕第五願無礙用。文並可知

佛子。菩薩摩訶薩有十種境界無礙用。何等爲十。所謂在法界境界而不捨衆生境界無礙用。在佛境界而不捨魔境界無礙用。在涅槃境界而不捨生死境界無礙用。入一切智境界而不斷菩薩種性境界無礙用。住寂靜境界而不捨散亂境界無礙用。住無去無來無戲論無相狀無體性無言說如虛空境界而不捨一切衆生戲論境界無礙用。住諸力解脫境界而不捨一切諸方所境界無礙用。入無衆生際境界而不捨教化一切衆生無礙用。住禪定解脫神通明智寂靜境界而於一切世界示現受生無礙用。住如

來一切行莊嚴成正覺境界。而現一切聲聞辟支佛  
寂靜威儀無礙用。是爲十

〔疏〕第六境界無礙。謂於此十種勝劣相違境中。於  
勝現劣。迴轉無礙。是爲菩薩分齊之境。文亦可知。  
佛子。菩薩摩訶薩有十種智無礙用。何等爲十。所謂  
無盡辯才無礙用。一切總持無有忘失無礙用。能決  
定知決定說一切衆生諸根無礙用於一念中以無  
礙智知一切衆生心之所行無礙用。知一切衆生欲  
樂隨眠習氣煩惱病隨應授藥無礙用。一念能入如  
來十力無礙用。以無礙智知三世一切劫及其中衆

生無礙用。於念念中。現成正覺。示現衆生。無有斷絕。無礙用。於一衆生。想知一切衆生業。無礙用。於一衆生音。解一切衆生語。無礙用。是爲十

〔疏〕第七智無礙。前來雖亦有智。各從本類攝之。今則一向辨其智用。然智無若干。因法顯別。以法從智。前法無礙。以智從法。十中初二能化智。次三知所化智。六上八佛智。前六皆權智。七八權實無礙智。後二事事無礙智。

佛子。菩薩摩訶薩有十種神通無礙用。何等爲十。所謂於一身示現一切世界身無礙用。於一佛衆會聽

受一切佛衆會中所說法無礙用於一衆生心念中。成就不可說無上菩提開悟一切衆生心無礙用以一音現一切世界差別言音。令諸衆生各得解了無礙用。一念中現盡前際一切劫所有業果種種差別。令諸衆生悉得知見無礙用。一微塵出現廣大佛刹無量莊嚴無礙用。令一切世界具足莊嚴無礙用。普入一切三世無礙用。放大法光明現一切諸佛菩提衆生行願無礙用。善守護一切天龍夜叉乾闥婆阿脩羅迦樓羅緊那羅摩睺羅伽釋梵護世聲聞獨覺菩薩所有如來十力菩薩善根無礙用。是爲十。若諸

菩薩得此無礙用。則能普入一切佛法。

疏第八神通無礙。一無數色身通。二天耳。三他心。四分別言辭。五宿住通。故度世經各見前世。六往一切佛刹通。莊嚴乃是其中別義。七未來劫通。前已明過去。故通舉三世。八卽一切法智通。故度世云。一切諸佛菩薩所建立。行演法光明而照耀之。卽是法光照佛法也。九卽天眼。度世云。知見一切等故。謂見有所作而守護之。十準晉本云。佛子。畧說菩薩平等觀一切諸法通自在。此卽一切法滅盡三昧通。平等寂滅故。故度世云。菩薩平等。寂諸

音響。則以平夷等御衆生。今文脫此文。中畧舉。故  
不曲盡。大旨不異。十通品辨。

佛子。菩薩摩訶薩。有十種神力無礙用。何等爲十。所  
謂以不可說世界置一塵中。無礙用於一塵中。現等  
法界一切佛刹。無礙用以一切大海水置一毛孔。周  
旋往返十方世界。而於衆生無所觸。燒無礙用。以不  
可說世界內自身中。示現一切神通所作無礙用。以  
一毛繫不可數金剛圍山。持以遊行一切世界。不令  
衆生生恐怖心。無礙用。以不可說劫作一劫。一劫作  
不可說劫。於中示現成壞差別。不令衆生心有恐怖。



無礙用。於一切世界現水火風災種種變壞而不惱  
衆生無礙用。一切世界三災壞時。悉能護持一切衆  
生資生之具。不令損缺無礙用。以一手持不思議世  
界。擲不可說世界之外。不令衆生有驚怖想無礙用。  
說一切刹同於虛空。令諸衆生悉得悟解無礙用。是  
爲十

〔疏〕第九神力無礙。神通多約外用無壅。神力多約  
內有幹能。故其十中。多約一毛含攝等。此卽身力。  
後是智力。若以通攝力。十種神力。但是一神足通  
耳。旣分通力兩殊。故十通中。少說神境。

佛子。菩薩摩訶薩有十種力無礙用。何等爲十。所謂  
衆生力無礙用。教化調伏不捨離故。刹力無礙用。示  
現不可說莊嚴而莊嚴故。法力無礙用。令一切身入  
無身故。劫力無礙用。修行不斷故。佛力無礙用。覺悟  
睡眠故。行力無礙用。攝取一切菩薩行故。如來力無  
礙用。度脫一切衆生故。無師力無礙用。自覺一切諸  
法故。一切智力無礙用。以一切智成正覺故。大悲力  
無礙用。不捨一切衆生故。是爲十。

疏第十力無礙用。悲智之力。皆無礙故。亦有事用  
無礙。從多說之。

佛子。如是名爲菩薩摩訶薩十種無礙用。若有得此十無礙用者。於阿耨多羅三藐三菩提欲成不成。隨意無違。雖成正覺而亦不斷行菩薩行。何以故。菩薩摩訶薩發大誓願。入無邊無礙用門。善巧示現故。

〔疏〕第四總結成益中。欲成不成。已得無礙。得果不捨因。尤顯無礙。

第八迴向卽十無礙。一門具十。共百門竟。

佛子。菩薩摩訶薩有十種遊戲。何等爲十。所謂以衆生身作刹身而亦不壞。衆生身是菩薩遊戲。以刹身作衆生身而亦不壞。於刹身是菩薩遊戲。於佛身示

現聲聞獨覺身而不損減。如來身是菩薩遊戲。於聲聞獨覺身示現。如來身而不增長。聲聞獨覺身是菩薩遊戲。於菩薩行身示現。成正覺身而亦不斷。菩薩行身是菩薩遊戲。於成正覺身示現。修菩薩行身而亦不減。成菩提身是菩薩遊戲。於涅槃界示現。生死身而不著。生死是菩薩遊戲。於生死界示現。涅槃亦不究竟。入於涅槃。是菩薩遊戲。入於三昧而示現。行住坐臥一切業。亦不捨三昧。正受是菩薩遊戲。在一佛所聞法受持。其身不動。而以三昧力。於不可說諸佛會中各各現身。亦不分身。亦不起定。而聞法受持。

相續不斷。如是念念於一一三昧身。各出生不可說不可說三昧身。如是次第一切諸劫。猶可窮盡。而菩薩三昧身不可窮盡。是菩薩遊戲。是爲十。若諸菩薩安住此法。則得如來無上大智遊戲。

〔疏〕第九遊戲下三門。明無縛無著解脫。迴向中行。彼有百門廣顯。以無縛著解脫。成就普賢自在智。用今畧其三。此門任志行。成遊賞自在。次門明境界難量。後門明智用幹能。皆由無縛無著故。今初十中。攝爲五對。一依正染淨相作。而皆不壞本相。正顯遊戲之義。如世縱情遊戲。無損動故。他皆做

此。一大小乘互現。二因果互現。三生死涅槃互現。五定散自在。謂初卽定中起用而常定。後卽用中入定而常用。

佛子。菩薩摩訶薩有十種境界。何等爲十。所謂示現無邊法界門。令衆生得入。是菩薩境界。示現一切世界無量妙莊嚴。令衆生得入。是菩薩境界。化往一切衆生界。悉方便開悟。是菩薩境界。於如來身出菩薩身。於菩薩身出如來身。是菩薩境界。於虛空界現世界。於世界現虛空界。是菩薩境界。於生死界現涅槃界。於涅槃界現生死界。是菩薩境界。於一衆生語言

中出生一切佛法語言。是菩薩境界。以無邊身現作一身。一身作一切差別身。是菩薩境界。以一身充滿一切法界。是菩薩境界。於一念中。令一切衆生發菩提心。各現無量身。成等正覺。是菩薩境界。是爲十。若諸菩薩安住此法。則得如來無上大智慧境界。

〔疏〕第二境界難量。通二種境。一卽遊戲所行之境。故晉經名爲勝行。二卽分齊之境。謂出沒無礙。唯菩薩能故。十中前三通所行境。後七皆分齊境。

佛子。菩薩摩訶薩有十種力。何等爲十。所謂深心力。不雜一切世情故。增上深心力。不捨一切佛法故。方

便力。諸有所作究竟故。智力。了知一切心行故。願力。一切所求令滿故。行力。盡未來際不斷故。乘力。能出生一切乘而不捨大乘故。神變力。於一一毛孔中各各示現一切清淨世界一切如來出興世故。菩提力。令一切衆生發心成佛無斷絕故。轉法輪力。說一句法悉稱一切衆生諸根性欲故。是爲十。若諸菩薩安住此法則得諸佛無上一切智十力。

〔疏〕第三十力智能。十中前七自。分力。後三勝進力。前中初三自利。一一向深求故。釋以不雜。二深求佛法。佛法卽是增上。三所作究竟者。由有善巧。次



二利他後二通二利餘可知

已上三門。明第九無縛無著解脫迴向竟

佛子。菩薩摩訶薩有十種無畏。何等爲十。佛子。菩薩摩訶薩悉能聞持一切言說。作如是念。設有衆生無量無邊。從十方來。以百千大法而問於我。我於彼問不見微少難可答相。以不見故。心得無畏。究竟到彼大無畏岸。隨其所問。悉能訓對。斷其疑惑。無有怯弱。是爲菩薩第一無畏。

〔疏〕第十無畏下四門。明法界無量迴向中。行之爲三。初門明所迴善根。次門明法界行體。後二

門明所成之德。今初卽是法施善根。無畏卽說法之德故。十中。一聞持無畏。

佛子。菩薩摩訶薩得如來灌頂無礙辯才。到於一切文字言音開示祕密究竟彼岸。作如是念。設有衆生無量無邊從十方來。以無量法而問於我。我於彼問不見微少難可答。相以不見故。心得無畏。究竟到彼大無畏岸。隨其所問悉能訓對。斷其疑惑無有恐懼。是爲菩薩第二無畏。

〔疏〕二辨才無畏。上二不畏不能答難。

佛子。菩薩摩訶薩知一切法空。離我離我所。無作。無

作者。無知者。無命者。無養育者。無補伽羅。離蘊界處。永出諸見。心如虛空。作如是念。不見衆生有微少。相能損惱我身語意業。何以故。菩薩遠離我我所故。不見諸法有少性相。以不見故。心得無畏。究竟到彼大無畏岸。堅固勇猛。不可沮壞。是爲菩薩第三無畏。

疏三二空無畏了達二空。不畏妄念。

佛子。菩薩摩訶薩。佛力所護。佛力所持。住佛威儀。所行真實。無有變易。作如是念。我不見有少分威儀。令諸衆生生訶責相。以不見故。心得無畏。於大衆中安隱說法。是爲菩薩第四無畏。

疏四威儀無缺無畏

佛子。菩薩摩訶薩。身語意業皆悉清淨。鮮白柔和。遠離衆惡。作如是念。我不自見身語意業而有少分可訶責相。以不見故。心得無畏。能令衆生住於佛法。是爲菩薩第五無畏。

疏五三業無過無畏。上二不畏外譏。

佛子。菩薩摩訶薩。金剛力士。天龍。夜叉。乾闥婆。阿脩羅。帝釋。梵王。四天王等。常隨侍衛。一切如來護念不捨。菩薩摩訶薩。作如是念。我不見有衆魔。外道。有見衆生。能來障我行菩薩道。少分之相。以不見故。心得

無畏。究竟到彼大無畏岸。發歡喜心行菩薩行。是爲菩薩第六無畏。

〔疏〕六外護無畏。不畏衆魔外道。

佛子。菩薩摩訶薩。已得成就第一念根。心無忘失。佛所悅可。作如是念。如來所說成菩提道文字句法。我不於中見有少分忘失之相。以不見故。心得無畏。受持一切如來正法行菩薩行。是爲菩薩第七無畏。

〔疏〕七正念無畏。不畏遺忘。

佛子。菩薩摩訶薩。智慧方便悉已通達。菩薩諸力皆得究竟。常勤教化一切衆生。恒以願心繫佛菩提。而

爲悲愍衆生故。成就衆生故。於煩惱濁世。示現受生。種族尊貴。眷屬圓滿。所欲從心。歡娛快樂。而作是念。我雖與此眷屬聚會。不見少相。而可貪著。廢我修行。禪定解脫。及諸三昧。總持辯才。菩薩道法。何以故。菩薩摩訶薩。於一切法。已得自在。到於彼岸。修菩薩行。誓不斷絕。不見世間。有一境界。而能惑亂菩薩道者。以不見故。心得無畏。究竟到彼大無畏岸。以大願力。於一切世界。示現受生。是爲菩薩第八無畏。

〔疏〕八方便無畏。不畏生處。如善治船。不懼海難。如

善治船者。卽大品  
經意。七地已引。

佛子。菩薩摩訶薩。恒不怠失薩婆若心。乘於大乘行菩薩行。以一切智大心勢力。示現一切聲聞獨覺寂靜威儀。作如是念。我不自見。當於二乘而取出離少分之相。以不見故。心得無畏。到彼無上大無畏岸。普能示現一切乘道。究竟滿足平等大乘。是爲菩薩第九無畏。

〔疏〕九一切智心無畏。不畏二乘。

佛子。菩薩摩訶薩。成就一切諸白淨法。具足善根圓滿神通。究竟住於諸佛菩提。滿足一切諸菩薩行。於諸佛所受一切智灌頂之記。而常化衆生行菩薩道。

作如是念。我不自見有一衆生。應可成熟而不能現。諸佛自在而成熟。相以不見故。心得無畏。究竟到彼大無畏岸。不斷菩薩行。不捨菩薩願。隨所應化一切衆生。現佛境界而化度之。是爲菩薩第十無畏。佛子。是爲菩薩摩訶薩十種無畏。若諸菩薩安住此法。則得諸佛無上大無畏。而亦不捨菩薩無畏。

〔疏〕十具行無畏。不畏不能化生。

佛子。菩薩摩訶薩有十種不共法。何等爲十。佛子。菩薩摩訶薩不由他教。自然修行六波羅蜜。常樂大施。不生慳悋。恒持淨戒。無所毀犯。具足忍辱。心不動搖。



有大精進未曾退轉。善入諸禪。永無散亂。巧修智慧。悉除惡見。是爲第一。不由他教。隨順波羅蜜道。修六度不共法。佛子。菩薩摩訶薩。普能攝受一切衆生。所謂以財及法而行惠施。正念現前。和顏愛語。其心歡喜。示如實義。令得悟解。諸佛菩提。無有憎嫌。平等利益。是爲第二。不由他教。順四攝道。勤攝衆生。不共法。佛子。菩薩摩訶薩。善巧迴向。所謂不求果報迴向。順佛菩提迴向。不著一切世間禪定三昧迴向。爲利益一切衆生迴向。爲不斷如來智慧迴向。是爲第三。不由他教。爲諸衆生發起善根。求佛智慧。不共法。

疏第二不共法。正明法界行體。以稱法界起行。故不共凡小。又悟不由他。亦非他共。十中一自利行。二他化行。三上求行。

佛子。菩薩摩訶薩。到善巧方便究竟彼岸。心恒顧復一切衆生。不厭世俗凡愚境界。不樂二乘出離之道。不著已樂。唯勤化度。善能入出禪定解脫。於諸三昧。悉得自在。往來生死如遊園觀。未曾暫起疲厭之心。或住魔宮。或爲釋天梵王世主。一切生處。靡不於中而現其身。或於外道衆中出家。而恒遠離一切邪見。一切世間文詞呪術。字印筭數。乃至遊戲歌舞之法。

悉皆示現無不精巧。或時示作端正婦人。智慧才能世中第一。於諸世間出世間法。能問能說。問答斷疑。皆得究竟。一切世間出世間事。亦悉通達。到於彼岸。一切衆生恒來瞻仰。雖現聲聞辟支佛威儀而不失大乘心。雖念念中示成正覺而不斷菩薩行。是爲第四。不由他教。方便善巧。究竟彼岸。不共法。

〔疏〕四善巧行。於中五。一巧離二乘。二善能下。巧修三昧。三往來下。巧順世間。四雖現下。巧住諸乘。五雖念念下。巧窮因果。

佛子。菩薩摩訶薩。善知權實雙行道。智慧自在。到於

究竟所謂住於涅槃而示現生死。知無衆生而勤行教化。究竟寂滅而現起煩惱。住一堅密智慧法身而普現無量諸衆生身。常入深禪定而示受欲樂。常遠離三界而不捨衆生。常樂法樂而現有姝女歌詠嬉戲。雖以衆相好莊嚴其身。而示受醜陋貧賤之形。常積集衆善無諸過惡。而現生地獄畜生餓鬼。雖已到於佛智彼岸。而亦不捨菩薩智身。菩薩摩訶薩成就如是無量智慧。聲聞獨覺尚不能知。何況一切童蒙衆生。是爲第五不由他教權實雙行不共法。

疏五雙行不共行有標釋結可知

佛子。菩薩摩訶薩身口意業隨智慧行皆悉清淨。所謂具足大慈永離殺心。乃至具足正解無有邪見。是爲第六不由他教身口意業隨智慧行不共法。

〔疏〕六三業隨智慧行。

佛子。菩薩摩訶薩具足大悲不捨衆生。代一切衆生而受諸苦。所謂地獄苦。畜生苦。餓鬼苦。爲利益故。不生勞倦。唯專度脫一切衆生。未曾耽染五欲境界。常爲精勤滅除衆苦。是爲第七不由他教常起大悲不共法。

〔疏〕七悲代他苦行。

佛子。菩薩摩訶薩常爲衆生之所樂見。梵王帝釋四天王等。一切衆生見無厭足。何以故。菩薩摩訶薩久遠世來。行業清淨。無有過失。是故衆生見者無厭。是爲第八不由他教。一切衆生皆悉樂見不共法。

〔疏〕八大慈攝物行

佛子。菩薩摩訶薩於薩婆若大誓莊嚴志樂堅固。雖處凡夫聲聞獨覺險難之處。終不退失一切智心。明淨妙寶。佛子。如有寶珠名淨莊嚴。置泥潦中。光色不改。能令濁水悉皆澄淨。菩薩摩訶薩亦復如是。雖在凡愚雜濁等處。終不失壞。求一切智清淨寶心。而能

令彼諸惡衆生。遠離妄見煩惱穢濁。得求一切智清淨心寶。是爲第九。不由他教。在衆難處。不失一切智心寶不共法。

〔疏〕九堅淨自他行。涅槃春池。可於中說。鈔涅槃春

經喻。乃有二意。一約教說。二約理說。今引涅槃。乃是約教。卽第二名春池。喻經云。譬如春時。有諸人等。在大池浴。乘船遊戲。失琉璃寶。沒深水中。是時諸人。悉共入水。求覓是寶。競捉瓦石。各各自謂得琉璃寶。歡喜持出。乃知非真。是時寶珠。猶在水中。以珠力故。水皆澄清。於是大衆。乃見寶珠。故在水下。猶如仰觀虛空月形。是時衆中。有一智人。以方便力。安徐入水。卽便得珠。遠公釋云。此卽對前比丘。歎昔所解無常。苦空無我。眞法。教其甄揀。於中先喻。後約喻教勸。喻中有三。一求真取僞。喻二歡喜下。知僞非眞。喻三。是時下。捨僞取眞。喻上方喻意。下約喻教勸。比丘。文別有四。一約初喻。呵其取

偽經云。汝等比丘。不應如是修集。無常苦無我想。不淨想等。以爲實義。如彼諸人。各以瓦石而爲寶珠。二約第三喻。教其取真。經云。汝等應當善學。方便在在處處。常修我想。常樂我淨想。三約第二喻。勸知昔偽。經云。復應當知。先所修習。四法相貌。悉是顛倒。四重約第三喻。勸修今真。經云。欲得真實。修諸想者。如彼智人。巧出寶珠。謂我想。常樂淨想。若直就經。宜用心觀。約理以說。經中初法。次喻。後合。以一切智。清淨妙法。而爲寶者。具三德。故明爲般若。淨卽解脫。妙爲法身。卽體之智。曰明。卽照之寂。爲淨。斯二不二。爲法身體。妙之至也。凡夫如泥。二乘有淺智。如潦。光色不改。不壞自心。令濁水清。卽是利他。遠見煩惱。異於凡夫。求一切智。異於二乘。故非凡夫行。非賢聖行。是菩薩行也。

佛子。菩薩摩訶薩。成就自覺境界智。無師自悟。究竟自在。到於彼岸。離垢法。繪以冠其首。而於善友不捨親近。於諸如來。常樂尊重。是爲第十。不由他教。得最



上法。不離善知識。不捨尊重佛。不共法。佛子。是爲菩薩摩訶薩十種不共法。若諸菩薩安住其中。則得如來無上廣大不共法。

〔疏〕十位滿常修行

佛子。菩薩摩訶薩有十種業。何等爲十。所謂一切世界業。悉能嚴淨故。一切諸佛業。悉能供養故。一切菩薩業。同種善根故。一切衆生業。悉能教化故。一切未來業。盡未來際攝取故。一切神力業。不離一世界徧至一切世界故。一切光明業。放無邊色光明。一光中有蓮華座。各有菩薩結跏趺坐而顯現故。一切三

寶種不斷業。諸佛滅後守護住持諸佛法故。一切變化業。於一切世界說法教化諸衆生故。一切加持業。於一念中隨諸衆生心之所欲皆爲示現。令一切願悉成滿故。是爲十。若諸菩薩安住此法。則得如來無上廣大業。

**疏**第三十種業下二門。明所成之德中。先明業用。十句可知。

佛子。菩薩摩訶薩有十種身。何等爲十。所謂不來身。於一切世間不受生故。不去身。於一切世間求不得故。不實身。一切世間如實得故。不虛身。以如實理示

世間故不盡身。盡未來際無斷絕。故堅固身。一切衆魔不能壞。故不動身。衆魔外道不能動。故具相身。示現清淨百福。相故無相身。法相究竟悉無相。故普至身。與三世佛同一身故。是爲十。若諸菩薩安住此法。則得如來無上無盡之身。

**疏**後門十身。顯得其體。然若身若業。皆同法界無量。畧舉十耳。此中十身。與第九行十身。大同小異。謂此不來不去。卽彼不生不滅。不實不虛。卽彼不實不妄。不盡堅固。卽彼不遷不壞。不遷則橫無遷變。不盡則豎說無窮。此中不動。卽彼一相。故文殊

般若云不動法界。法界卽一相。由得一相。魔不能動。此具相身。卽彼入一切世界。諸趣身。無相名同。普至身。卽彼入一切世界。非趣身。餘如十行中辨也。

已上四門。明第十法界無量迴向竟。上來十迴向位竟。

○大文第五十種身業下。有五十門。答五十問。明十地位中行相。

佛子。菩薩摩訶薩。有十種身業。何等爲十。所謂一身充滿一切世界身業。於一切衆生前。悉能示現身業。

於一切趣。悉能受生身業。遊行一切世界身業。往詣一切諸佛衆會身業。能以一手普覆一切世界身業。能以一手摩一切世界金剛圍山。碎如微塵身業。於自身中現一切佛刹成壞。示於衆生身業。以一身容受一切衆生界身業。於自身中普現一切清淨佛刹。一切衆生於中成道身業。是爲十。若諸菩薩安住此法。則得如來無上佛業。悉能覺悟一切衆生。

**疏**今依次分配十地。初地十門。次八漸畧。又勢爾故。謂二地六門。三四各五門。五二六一。七八各三。九地一門。十地十三門。至文當知。今初十門明歡。

喜地中行。若麤相分。總爲三段。初二約身。次四辨語。後四明意。總顯彼地三業殊勝。若順彼文且分爲二。初九明初住地中行。後一明安住地中行。前中分四。初六門明依何身。次心一門。辨以何因。三發心門。明爲何義。四周徧門。顯有何相。今初分二。前一約身辨身。後四就語辨身。語屬身故。皆是深種善根之所攝故。今初分二。此門約色身業用明身。十句可知。

佛子。菩薩摩訶薩。復有十種身。何等爲十。所謂諸波羅蜜身。悉正修行故。四攝身。不捨一切衆生故。大悲

身代一切衆生受無量苦無疲厭故。大慈身。救護一切衆生故。福德身。饒益一切衆生故。智慧身。與一切佛身同一性故。法身。永離諸趣受生故。方便身。於一切處現前故。神力身。示現一切神變故。菩提身。隨樂隨時成正覺故。是爲十。若諸菩薩安住此法。則得如來無上大智慧身。

〔疏〕後十種身。約法門自體明身。故但云身。十中度。攝福智等。卽前深種善根。集助道等。互有影畧。

佛子。菩薩摩訶薩有十種語。何等爲十。所謂柔輒語。使一切衆生皆安隱故。甘露語。令一切衆生悉清涼。

故不誑語。所有言說皆如實故。真實語。乃至夢中無  
妄語故。廣大語。一切釋梵四天王等皆尊敬故。甚深  
語。顯示法性故。堅固語。說法無盡故。正直語。發言易  
了故。種種語。隨時示現故。開悟一切衆生語。隨其欲  
樂令解了故。是爲十。若諸菩薩安住此法。則得如來  
無上微妙語。

疏二就語辨身中四門。皆是所種善根。是知彼文  
雖無義已含有。若全異彼。豈爲彼行。若全同彼。何  
須重說。故彼文節節皆云。若廣說者。不可窮盡。小  
異何疑。四門卽分爲四。初十種語。明語體用。若約



遮釋。十中。初一離惡口。二離兩舌。次二離妄語。一麤。二細。餘六離綺語。若約表釋。十種各顯一德。

佛子。菩薩摩訶薩有十種淨修語業。何等爲十。所謂樂聽聞如來音聲淨修語業。樂聞說菩薩功德淨修語業。不說一切衆生不樂聞語淨修語業。真實遠離語四過失淨修語業。歡喜踊躍讚歎如來淨修語業。如來塔所高聲讚佛如實功德淨修語業。以深淨心施衆生法淨修語業。音樂歌頌讚歎如來淨修語業。於諸佛所聽聞正法不惜身命淨修語業。捨身承事一切菩薩及諸法師。而受妙法淨修語業。是爲十。

〔疏〕二十種淨修語顯語淨因。初二攝法。次二離過。次二攝善。次二法施。後二求法行。由此十事能令語淨。

若菩薩摩訶薩以此十事淨修語業。則得十種守護。何等爲十。所謂天王爲首。一切天衆而爲守護。龍王爲首。一切龍衆而爲守護。夜叉王爲首。乾闥婆王爲首。阿脩羅王爲首。迦樓羅王爲首。緊那羅王爲首。摩睺羅伽王爲首。梵王爲首。一一皆與自己徒衆而爲守護。如來法王爲首。一切法師皆悉守護。是爲十。

〔疏〕三十王守護卽淨語之果。發其言善。幽冥應之。

况其人乎。然地經中。善知識善護。意通由諸善。不獨由語。故度世經。亦不躡前。

佛子。菩薩摩訶薩。得此守護已。則能成辦十種大事。何等爲十。所謂一切衆生皆令歡喜。一切世界悉能往詣。一切諸根皆能了知。一切勝解悉令清淨。一切煩惱皆令除斷。一切習氣皆令捨離。一切欲樂皆令明潔。一切深心悉使增長。一切法界悉令周徧。一切涅槃普令明見。是爲十。

〔疏〕四。十種大事。按經卽內善外護。故能成所作。然卽地經善集白法。善淨深心等。餘句中義。亦不獨

躡於語。然皆躡者。以語例餘。於理無爽。十句竝通  
二利。文相亦顯。

佛子。菩薩摩訶薩有十種心。何等爲十。所謂如大地  
心。能持能長一切衆生諸善根故。如大海心。一切諸  
佛無量無邊大智法水悉流入故。如須彌山王心。置  
一切衆生於出世間最上善根處故。如摩尼寶王心。  
樂欲清淨無雜染故。如金剛心。決定深入一切法故。  
如金剛圍山心。諸魔外道不能動故。如蓮華心。一切  
世法不能染故。如優曇鉢華心。一切劫中難值遇故。  
如淨日心。破暗障故。如虛空心。不可量故。是爲十。若

諸菩薩安住其中。則得如來無上大清淨心。

〔疏〕第二十種心者。明以何因。以大悲爲首。荷負一切等故。十中一荷負心。心如大地。荷四重任故。二深廣心。包含無外故。三勝心。四淨心。五利。六堅。七無染。八希有。九智慧。十無邊。並語心體也。

佛子。菩薩摩訶薩有十種發心。何等爲十。所謂發我當度脫一切衆生心。發我當令一切衆生除斷煩惱心。發我當令一切衆生消滅習氣心。發我當斷除一切疑惑心。發我當除滅一切衆生苦惱心。發我當除滅一切惡道諸難心。發我當敬順一切如來心。發我

當善學一切菩薩所學心。發我當於一切世間一一  
毛端處現一切佛成正覺心。發我當於一切世界擊  
無上法鼓。令諸衆生隨其根欲。悉得悟解心。是爲十。  
若諸菩薩安住其中。則得如來無上大發起能事心。  
〔疏〕第三十種發心者。明爲何義爲上求下化。故發  
起勝用十句可知。

佛子。菩薩摩訶薩有十種周徧心。何等爲十。所謂周  
徧一切虛空心。發意廣大故。周徧一切法界心。深入  
無邊故。周徧一切三世心。一念悉知故。周徧一切佛  
出現心。於入胎誕生出家成道轉法輪般涅槃悉明。

了故周徧一切衆生心。悉知根欲習氣故周徧一切智慧心。隨順了知法界故周徧一切無邊心。知諸幻網差別故周徧一切無生心。不得諸法自性故周徧一切無礙心。不住自心他心故周徧一切自在心。一念普現成佛故是爲十。若諸菩薩安住其中。則得無量無上佛法周徧莊嚴。

〔疏〕第四十種周徧心。明有何相。以過凡夫地。入真如法中故。十中。一總明悲廣智大曠若虛空。二智契深極餘皆可知。

佛子。菩薩摩訶薩有十種根。何等爲十。所謂歡喜根。

見一切佛信不壞故。希望根。所聞佛法皆悟解故。不退根。一切作事皆究竟故。安住根。不斷一切菩薩行故。微細根。入般若波羅蜜微妙理故。不休息根。究竟一切衆生事故。如金剛根。證知一切諸法性故。金剛光燄根。普照一切佛境界故。無差別根。一切如來同一身故。無礙際根。深入如來十種力故。是爲十。若諸菩薩安住其中。則得如來無上大智圓滿根。

〔疏〕第二十種根。卽安住地中行。由前初住之行。令此勝用增上。皆光顯故。名之爲根。十中分三。初一信成就。次六修行成就。於中初句樂欲根。卽近安



樂法多聞能正觀故。二不退者。卽不著名利。於三昧中亦無愛著。及貪求故。三安住者。萬行念念現前故。四五悲智不斷。上皆教道。六卽證道之修。後三卽迴向成就。一總求一切地智故。卽金剛智。照徹法性故。二別求法身。三求功德身。謂十力等。

已上十門明初地竟

佛子。菩薩摩訶薩有十種深心。何等爲十。所謂不染一切世間法深心。不雜一切二乘道深心。了達一切佛菩提深心。隨順一切智智道深心。不爲一切衆魔外道所動深心。淨修一切如來圓滿智深心。受持一

切所聞法深心。不著一切受生處深心。具足一切微細智深心。修一切諸佛法深心。是爲十。若諸菩薩安住其中。則得一切智無上清淨深心。

〔疏〕第二十種深心。下六門。明第二地中行。於初二。初二門。明發起淨十種深心。後四門。自體淨。今初。前門自分。直明深心。後門勝進。加以增上。今初。晉經及論。皆名直心者。然深心有二義。一於法殷重名深。卽樂修善行。二契理名深。深入理故。若語直心。但有後義。正念真如法故。今文具二。初由契理。二由修行。次七廣上契理。後一顯前修行。

佛子。菩薩摩訶薩有十種增上深心。何等爲十。所謂不退轉增上深心。積集一切善根故。離疑惑增上深心。解一切如來密語故。正持增上深心。大願大行所流故。最勝增上深心。深入一切佛法故。爲王增上深心。一切佛法自在故。廣大增上深心。普入種種法門故。上首增上深心。一切所作成辦故。自在增上深心。一切三昧神通變化莊嚴故。安住增上深心。攝受本願故。無休息增上深心。成熟一切衆生故。是爲十。若諸菩薩安住此法。則得一切諸佛無上清淨增上深心。

〔疏〕二增上深心。卽勝進上求增殷重故。十句亦四。初門樂修善行。二標契理。次三成上離疑。一出所因。二彰所入。三成德自在。後五成上積集善根。

佛子。菩薩摩訶薩有十種勤修。何等爲十。所謂布施勤修。悉捨一切不求報故。持戒勤修。頭陀苦行。少欲知足。無所欺故。忍辱勤修。離自他想。忍一切惡。畢竟不生恚害心故。精進勤修。身語意業未曾散亂。一切所作皆不退轉。至究竟故。禪定勤修。解脫三昧出現神通。離一切欲煩惱鬪諍諸眷屬故。智慧勤修。修習積聚一切功德。無厭倦故。大慈勤修。知諸衆生無自

性故。大悲勤修。知諸法空。普代一切衆生受苦無疲  
厭。故覺悟如來十力勤修。了達無礙。示衆生故。不退  
法輪勤修。轉至一切衆生心故。是爲十。若諸菩薩安  
住此法。則得如來無上大智慧勤修。

〔疏〕第二十種勤修。下四門。明自體淨中行。彼約別  
地之行。但明於戒。而有二聚。今文分二。初一門通  
修十度。卽攝善法戒律儀亦在其中。以地相望。是  
修位之首。故特名勤修。晉經名方便。方便修起。故  
佛子。菩薩摩訶薩有十種決定解。何等爲十。所謂最  
上決定解。種植尊重善根故。莊嚴決定解。出生種種

莊嚴故廣大決定解。其心未曾狹劣故。寂滅決定解。能入甚深法性故。普徧決定解。發心無所不及故。堪任決定解。能受佛力加持故。堅固決定解。摧破一切魔業故。明斷決定解。了知一切業報故。現前決定解。隨意能現神通故。紹隆決定解。一切佛所得記故。自在決定解。隨意隨時成佛故。是爲十。若諸菩薩安住此法。則得如來無上決定解。

〔疏〕二決定解下三門。明饒益有情戒中行。此門總顯智。於諸善決起勝解。地經約戒。但解十善。晉經名樂修。由有決解。故樂修習。

佛子。菩薩摩訶薩有十種決定解。知諸世界。何等爲十。所謂知一切世界。入一世界。知一世界。入一切世界。知一切世界。一如來身。一蓮華座。皆悉周徧。知一切世界。皆如虛空。知一切世界。具佛莊嚴。知一切世界。菩薩充滿。知一切世界。入一毛孔。知一切世界。入一衆生身。知一切世界。一佛菩提樹。一佛道場。皆悉周徧。知一切世界。一音普徧。令諸衆生各別了知。心生歡喜。是爲十。若諸菩薩安住此法。則得如來無上佛刹廣大決定解。

〔疏〕二解世界

佛子。菩薩摩訶薩有十種決定解。知衆生界。何等爲十。所謂知一切衆生界本性無實。知一切衆生界悉入一衆生身。知一切衆生界悉入菩薩身。知一切衆生界悉入如來藏。知一衆生身普入一切衆生界。知一切衆生界悉堪爲諸佛法器。知一切衆生界隨其所欲爲現釋梵護世身。知一切衆生界隨其所欲爲現聲聞獨覺寂靜威儀。知一切衆生界爲現菩薩功德莊嚴身。知一切衆生界爲現如來相好寂靜威儀。開悟衆生是爲十。若諸菩薩安住此法。則得如來無上大威力決定解。



疏三解衆生文相竝顯

已上六門明二地竟

弘法比丘報恩傳昱二白雲普敬二鼓  
山太靖兩延津普通寺德修兩五同刊  
華嚴疏論纂要第九十三卷伏願處法  
幢於刹刹塵塵度含生於在在處處同  
登華藏共證眞常德修薦亡徒慧性一  
念圓明離一切相萬緣頓息早證菩提  
康熙二十年八月朔旦 華藏室謹題

大方廣佛華嚴經疏論纂要卷第九十三